

Tragedi MH370: Najib Berterima Kasih Kepada PM Australia Bantu Cari Pesawat Malaysia Yang Hilang

Bernama

3 Apr, 2014

Oleh Mohd Razman Abdullah

PERTH, 3 April (Bernama) -- Perdana Menteri Datuk Seri Najib Tun Razak melawat pangkalan Tentera Udara Diraja Australia (RAAF) Pearce di sini Khamis untuk secara peribadi mengucapkan terima kasih kepada Perdana Menteri Australia Tony Abbott dan lain-lain yang terlibat dalam misi mencari pesawat Malaysia yang dipercayai jatuh di selatan Lautan Hindi.

Najib menzahirkan penghargaan kepada Abbott kerana bersetuju mengetuai operasi mencari di selatan Lautan Hindi dan menerima pelawaan Malaysia bagi Australia turut serta sebagai wakil bertauliah dalam penyiasatan itu.

"Pada waktu sukar ini, Australia terbukti sahabat yang amat bernilai. Pihak berkuasa Australia, seperti banyak negara lain, telah menawarkan bantuan mereka tanpa teragak-agak atau lewat. Saya dengan penuh ikhlas mengucapkan terima kasih kepada Australia bagi semua yang mereka telah lakukan, dan sedang lakukan, untuk mencari pesawat.

"Kami juga amat berterima kasih kepada mereka yang telah membawa bersama-sama pakar mereka untuk merungkai apa yang disebutkan oleh Perdana Menteri Abbott sebagai 'satu daripada misteri paling luar biasa pada masa kini,'" katanya dalam sidang media bersama-sama Abbott di pangkalan itu.

Semasa mengucapkan terima kasih kepada semua yang terlibat dalam operasi mencari itu, Najib berkata mereka telah bertungkus lumus berusaha mencari pesawat Malaysia Airlines (MAS), MH370.

"Sepanjang tiga minggu lepas, beratus-ratus orang telah mengharungi perjalanan beribu-ribu kilometer untuk membantu. Mereka telah melakukan pencarian dalam keadaan laut bergelora, berkabus dan suhu amat sejuk.

"Mereka belayar dalam keadaan ribut petir untuk mencari pesawat. Kita terhutang budi kepada setiap seorang daripada mereka.

"Ini merupakan satu usaha yang amat mengagumkan, telah menyatukan negara-negara dari seluruh dunia. Semasa MH370 didapati hilang, berpuluh-puluh negara menjawab seruan bagi bantuan. Komitmen mereka tidak akan dilupakan," katanya.

Najib berkata perbezaan diketepikan pada saat 26 negara bersatu dengan satu matlamat.

"Tatkala berdepan tragedi ini - bagi negara-negara yang warganegara mereka berada dalam pesawat ini, dan keluarga yang anggota keluarga tersayang mereka hilang -- kerjasama ini memberikan kekuatan kepada kita. Kehilangan MH370 merupakan insiden yang tidak pernah dialami sebelum ini; begitu juga dengan misi pencarian ini," katanya.

Najib turut mengadakan pertemuan dengan anggota tentera laut dan tentera udara dan bercakap dengan komander dari tujuh negara yang terlibat dalam misi pencarian di selatan Lautan Hindi.

"Mereka memberitahu saya tentang kesukaran misi pencarian seperti ini; dari segi jarak, dan cuaca, dan untuk mengekalkan semangat jitu untuk tempoh yang lama," katanya.

Penerbangan MH370, membawa 227 penumpang dan 12 anak kapal, hilang daripada imbasan radar semasa berada di kawasan Laut China Selatan pada 8 Mac lepas, kira-kira sejam setelah berlepas dari Lapangan Terbang Antarabangsa KL pada 12.41 tengah malam. Pesawat itu sepatutnya mendarat di Beijing 6.30 pagi hari sama.

Misi mencari pesawat itu melibatkan pelbagai negara, pada mulanya di kawasan Laut China Selatan dan kemudiannya - selepas pesawat itu dikesan melencong daripada laluan - di sepanjang dua koridor iaitu koridor utara dari sempadan Kazakhstan dan Turkmenistan hingga utara Thailand dan koridor selatan dari Indonesia sehingga selatan Lautan Hindi.

Berikutan hasil analisis terhadap data satelit, syarikat telekomunikasi satelit United Kingdom Inmarsat dan Cawangan Penyiasatan Kemalangan Udara UK (AAIB) merumuskan Penerbangan MH370 terbang di sepanjang koridor selatan dankedudukan terakhirnya di tengah Lautan Hindi, barat Perth.

Najib kemudian mengumumkan pada 24 Mac, 17 hari selepas kehilangan pesawat Boeing 777-200 itu, Penerbangan MH370 "berakhir di selatan Lautan Hindi".

Abbott turut menyatakan komitmen Australia untuk meneruskan misi mencari "walaupun ia mengambil masa yang lama".

"Ia merupakan misi mencari yang paling sukar pernah dilakukan," katanya dan menurutnya operasi mencari adalah berdasarkan maklumat dikumpul oleh pakar daripada data satelit.

Najib turut menegaskan Malaysia tidak akan berputus asa dan mengalah dalam usaha mencari pesawat itu.

Berdepan dengan begitu sedikit bukti, dan tugas amat sukar ini, Najib berkata para penyiasat dari Malaysia, AS, UK, China, Australia dan Perancis telah bekerja keras tanpa mengenal penat lelah untuk mendedahkan pergerakan pesawat yang menjerus kepada kawasan pencarian ketika ini.

"Saya tahu selagi pesawat itu tidak ditemui, banyak keluarga tidak boleh mula berkabung. Saya tidak dapat bayangkan kesedihan yang sedang mereka lalui.

Tetapi saya boleh berjanji kepada mereka yang kami tidak akan berputus asa dan mengalah," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1027641>